

晚

晴

移

詩

匯

晚晴移詩匯卷一百三目錄

福康安 八首

和琳 四首

豐紳殷德 二首

孔慶鎔 一首

富明安 一首

李奉翰 二首

胡季堂 二首

玉德 一首

景安 三首

毓奇 二首

韓鐸 一首

江春 三首

湯懋綱 七首

伊嵩阿 一首

夏宗瀾 三首

曹錫勳 一首

侯日曦 一首

劉大觀 三首

陳繩祖 二首

覺羅恆慶 一首

張裕穀 三首

陳廣甯 六首

朱曾敬 二首

汪爲霖 六首

江昉 四首

田玉 二首

黃易 六首

陳及祖 一首

張道渥 一首

管學洛 四首

徐書受 六首

王復 八首

楊瑛昶 二首

湯懋統 一首

孫文驊 二首

黃立世 四首

顧鑒 三首

應禮 一首

王初桐 五首

朱光暄 二首

穆得元 一首

伍光瑜 一首

李承烈 三首

李燧 三首

曾艾 一首

朱克振 一首

姜貽績 二首

王翼孫 二首

王世錦 一首

陳丙 二首

晚晴籀詩匯卷一百三

徐世昌

福康安字瑤林滿洲旗人官至武英殿大學士封忠銳

嘉勇貝子贈郡王諡文襄

詩話文襄早歲建旄節西平廓爾喀東定臺灣如大雲山房所紀其平時馭將臨陳決策誠有不愧大將才者世或以其內附椒塗早膺茅土議爲衛霍之儔殆亦未盡然也詩僅此八首見熙朝雅頌集中以其語意相承自成章法故全錄之

寄惠椿亭侍郎

城南韋杜甲門高垂老論文意氣豪記否朝回花底譙酒痕猶漬舊宮袍

少年許國兩心同紫陌紅塵並玉驄無那天風分雁序君行西塞我遼東

龍沙萬里悵離羣
自此參辰宦蹟分
料得天涯勞遠夢
滇風蜀雪又秦雲

幾替剖鯁得瓊章
昔款今情爾許長
最是關心箋尾句
萬金書屬寄高堂

去年沙磧衝寒去
鏡海冰花襯馬蹏
手把鞭梢指蔥嶺
故人還在嶺雲西

華髮扶鳩盼早歸
寸心藉可報春暉
承歡歲月皆君賜
五色宮袍綯舞衣

忽忽駸輪倏九年
而今纔見使星旋
入關定遠頭還黑
僂指旌旄過酒泉

句寫相思附尺函
殷勤遣使迂征驂
蘭山未把平原酒
先抵西窗一夕譚

和琳字希齋滿洲旗人由筆帖式官至四川總督封一

等宣勇公諡忠壯

詩話希齋爲致齋弟藉其餘蔭游擢兼圻爵列上公伯食太廟致齋得罪後亦見削奪隨園嘗錄其詩西招數首乃駐藏時作聊存其概

四招四時吟

莫訝春來後寒威倍勝前小窗欣日色大漠渺人煙風怒沙能語山危雪弄權略應桃柳意塞上怯爭妍

山陽四五月嫩綠漸生生草老剛盈寸花稀不識名開窗紈扇廢挾纈紵羅輕樹有濃陰處都翻絃索聲

南山看霧起雷爲雨吹噓淡淡秋無跡淙淙夜不虛池塘堪浴佛裸麥漸倉儲更喜羊脂厚廚供大嚼初

木炭供來日陂塘半涸冰草枯歸牧馬寒重斂飛蠅沙漬

衣多垢山童雪不疑客游閒戲筆真箇悟三乘

豐紳殷德字潤圃滿洲旗人官副都統有延禧堂詩鈔

詩話潤圃致齋子致齋事敗仁廟以潤圃尙主特有意全之潤圃亦小心謹畏克保其世與致齋並有詩藁流傳今舍致齋而錄潤圃以次希齋之後

春晴野望

西山積雪消霽色散平楚微風扇淑氣閑雲澹容與溪流
春漲生厯厯魚堪數悠揚遠寺鐘掩映隔村樹翠壁倚高
寒晴霞橫一縷陽阿花欲綻幽磴禽交語羨彼山中居遐
觀獨延佇

曉起望諸峯積雪口占一絕

曉瞻積素徧巉峴縹緲雲封十八盤我欲乘風起汗漫遙
知高處不勝寒

孔慶鎔字治山曲阜人孔子七十三世孫襲封衍聖公
有鐵山園詩藁

漁人再覓桃花源不得路憶隱者

一舟重破綠溪煙風景依稀別有天路轉峯迴非舊跡水
光山色認前緣昨宵雞酒還疑夢此景蒼茫似隔年滿地
落花人悵望白雲深鎖夕陽邊

富明安字師樊號仁軒滿洲旗人由筆帖式官至湖廣
總督諡恭恪有挹翠軒詩草

游西山

倦游餘興在歸路踏殘陽花發青林外人行綠水傍落霞
城堞隱芳草馬蹏香卽景須行樂何妨作酒狂

李奉翰字薌林漢軍旗人官至兩江總督

詩話薈林仍世官總河灑澗沈災民
頌其績詩清婉雅有漁洋山人風度

秋日道中寄丁星墅

乍見江楓葉已丹偶然別緒上眉端
秋花小閣人敲枕疏柳長隄我據鞍
雁影雲隨天際遠潮聲風送晚來寒
未殘叢菊還宜醉好把新篇寄與看

秋日江行

蓬窗心蹟羨沙鷗幾處疏林映玉鉤
柔艣聲中黃葉冷奚囊載得一江秋

胡季堂字升夫號雲坡光山人廕生
授順天通判官至直隸總督加太子
太保贈太子太傅諡莊敏有培蔭
軒詩集

詩話莊敏承文良公家學案牘之暇
執卷如諸生故於政事掌故淹貫如
流詩非所長氣自清穩

訪錢籜石閣學留坐四照樓卻賦一律卽呈籜石

時

石視學山左樓在學使署施愚山先生題

攜手同登四照樓湖山面面坐中收

大明湖在學署前

濟流起伏

來千丘岱嶽崢嶸壓二州過眼煙雲憑去住到庭風月任
句留從知學士多豪興把盞敲詩醉不休

厯下亭

久聞厯下亭名古今識亭窗向水開恬靜湖光歸几席翠
微山色入追陪一城礎杵秋聲遠幾處蒹葭野岸隈莫道
終宵人迹少涵虛應有夜珠來

玉德字達齋滿洲旗人由官學生考授內閣中書累官
閩浙總督降烏什辦事大臣有餘蔭堂詩藁

夜宿紫陽宮聽瀑

不辨風聲是雨聲松濤瀑布枕邊生空山大谷鳴金鐵威
壯元戎萬馬行

景安字憶山滿州旗人由官學生考授內閣中書官至
工部尙書有深省堂詩集

沛翁以樽酒見惠賦謝

西風吹鬢冷涼月入懷虛樹杪秋聲寄籬邊菊影疏飲綠
無酒戒病豈仗醫除開甕欣何以陶然醉有餘

壽陽道中

山程逐日入清幽澗水潺潺漱石流欲問關情何處是半
林紅葉寫深秋

中秋前一夜作

梧桐移月影移扉銀漢迢迢夜漏稀古驛三更人未卧碧

天一字雁初歸病軀不爲閒愁瘦詩藁偏因秋色肥白髮
蕭蕭過半世恍如蝶夢戀花飛

毓奇字鍾山號竹溪滿洲旗人襲子爵官至漕運總督
有靜怡軒詩集

淮陰懷古

重城虎踞鎮淮流遶郭帆檣日夜浮漂母荒祠花草豔枚
皋舊宅燕鶯留五王戈甲爭南渡六代英雄據上游往事
銷沈形勝在空教極目海天秋

午日邀趙耘松觀察暨惕莊晴嵐小集次耘松韻

廿年舊雨此重親卮酒甯辭一再巡往事休驚嘶陣馬清
歌喜對倚樓人平蠻經濟留聲遠課士文章報國均時主講揚
州暢好竹西風雅地歐蘇千古共昏晨

韓鏐字蘭亭畢節人貢生由通判官至兵部侍郎

同人小集曉嵐宗伯歸途成詩次韻

詞鋒料揀必精英隔歲慚余句始成形跡都忘新舊雨談
諧自見古今情青樽恰借輕風送白袷偏宜澹月明欣際
太平無一事會聯真率過餘生

江春字穎長號鶴亭歙縣人官奉宸苑卿加布政使銜

有隨月讀書樓詩集

詩話鶴亭業淮離六次祇候高宗南巡渥叨恩賚
葺康山草堂翠華臨幸賜額賜詩稱承平盛事當時
淮南富庶甲天下鶴亭與盧雅雨都轉同好延攬名
流鼓吹風雅文人學士皆歸焉其文采不敵玲瓏山
館馬氏昆季豪舉過之從弟硯農詩
較有格尤工填詞蘊藉勝於兄云

何日山中住

何日山中住山中我舊知茅堂深竹裏螺徑夕陽時黃蝶

穿籬疾閒雲出岫遲今朝對明鏡愁見髮成絲

竹屋

曲廊暗接隱斜闌數卷閒書一畫竿不是種花先種竹愛
他時作雨聲寒

登泰山

白雲出其下終古泰山青到地盤珠館捫天疊翠屏明禋
尊嶽瀆封禪配云亭齊魯峯無數蒼蒼入杳冥

直上高無極橫空十八盤樹傳秦帝爵雲護漢皇壇俯瞰
東山小平臨北斗寒遙知滄海上一氣走雙丸

湯懋綱字維三號奕園巢縣人歷官刑部郎中有奕園
集

詩話奕園與弟青坪皆能詩忱歸愚選別裁集奕園
尚存採青坪詩數篇稱其兄弟皆擅清名爲居巢僅

見者

宏證庵避雨

重雲壓翠微
秋林響不定
灑灑飛雨來
尋行入幽徑
室靜凝清香
堂虛應孤磬
目從寂滅觀
耳向虛無聽
茶熟話三乘
發余禪悅性

秋懷

井梧飄葉後
眾樹聲惻惻
未卽傷凋零
已暗銷精力
野客賞丹黃
謂勝春花色
入林豈不佳
撫懷增太息
衰境諒如斯
漸有寒霜逼

冬日雜興

疏放難違性
苔荒野巷深
到門黃葉雨
隱几白雲心
但使勝三雅
何勞戲五禽
吾生原不繫
眾累亦徒侵

過眼忘牽滯隨心泯怨憎青山良有意白髮豈無能嶺首
雲門杖林腰佛屋鐙拋踪外塵事此興獨堪乘

童燕烏薪暝垂簾向客論老懷唯近古學究不妨村豈務
藏崖穴甘輸倚市門約探梅信去霜曉或煙昏

遮戶漁罾罷溪山靜有情樹梢煙際簇鷗背日邊明俗自
濃新態人誰責舊盟荒園存古柏卻與抱孤清

九日雨中集東皋姚王祠

痛目秋陰菊尙遲佳辰還起昔人思漫愁風雨潘邠老須
縱登臨杜牧之山郭雲昏潮落後湖天煙冷雁飛時陂陀
路轉千林表樂歲笙鏞賽古祠

伊嵩阿字峻齋滿州旗人官員外郎有念修堂詩草

詩話峻齋情才早世曙後星孤其妻希光撫女遣嫁
乃自經以殉後峻齋卒十年矣從容就義時驚以爲

奇節

對凱頭陀舊畫有感

展卷猶憐古墨香
思君顏色轉蒼茫
空餘指下青山老
不見樽前白髮狂
幾度雲煙傷過眼
六年風雨想連牀
頭陀撩腳歸何處
定向虛無覓故鄉

夏宗瀾字起八江陰人諸生官國子監丞有入粵紀行

詩

詩話起八湛深經術從同里楊文定公於慎中講授
易詩傳安溪之學及文定入朝莞國學疏薦授官分
領六堂講肄後去官主講保定蓮池
書院造就經生詩喜作盤空硬語

石機棧

石機之棧何其高
湘流急去浮金鰲
長松厯落蔭雲日
天風一吼生秋濤
下有深谷最幽絕
六月炎蒸常積雪
渾疑

巨靈開笑口一望驚心更擣舌懸厓直俯馮夷宮周遭怪
石多玲瓏射來是虎纏苔碧叱處成羊蝕蘚紅我生素負
登山癖每遇高峯頻蠟屐獨有茲山不可攀欲上先愁無
羽翼安得五日晝石手遣向石磯壁上走

全州道中

此處溪山好遨遊豈偶然奇峯盤曲澗怪石漱流泉白濛
空中瀑青窺洞裏天磨厓堪作記絕似語溪邊

至柳城界遠望烏蠻山

山色烏蠻近柳城扁舟夜泊夢還驚漁燈明滅飛螢墜人
語鉤輈老鸛鳴險絕關門都號鬼蒼然草木尙疑兵荒江
一望人煙杳杜宇休啼已淚傾

曹錫輔字菽圃上海人官員外郎有碧鮮齋詩鈔

秋夜坐無隱廬

夜氣澄如水西風雨後涼坐知廬可愛徑與世相忘人靜
蟲吟壁窗虛月到牀蕭然何所寄滿院足秋香

侯日曦字景園南皮人官刑部主事有礪軒詩集

新秋夜雨

散步閒階下重門閉夕陰向人寒燭盡帶雨夜鐘深流水
從他事泊雲任此心世情何處淡瀟灑發長吟

劉大觀字松嵐邱縣人拔貢歷官山西河東道署布政
使有玉磬山房集

桂林卽事

白雲長護孔明臺臺上扶桑花自開一夕東風天驟暖梧
州已送荔支來

得張廬峯消息

胥江一棹暮雲疏，心似蛩蛩失駟驢。
正苦春愁難自遣，海風吹到故人書。

讀王先生猷定四照堂詩書後

先生南昌人，號于一，好學，性恬退，與喻仲

宣丁仲陽號三隱君

西江詩派本然清，造句還如玉琢成。
百怪盤胸能匠物，孤岑晦跡恐沽名。
樽桑日影桃花寺，韎韐風濤鐵甕城。
目斷長湖人漸老，黃冠麥飯獨關情。

陳繩祖字孝祐，號經橋，祁陽人。歷官廣東督糧道，有經橋遺藁。

詩話：經橋觀察爲文肅公第二子，以門蔭入官，游陟監司，早歲乞歸優游。文酒詩疏，宕闊拓於玉局爲近。
題唐毓東倣倪高士秋林圖

惜墨如金不盈紙畫師惟有倪高士別開生面寫山林肯
使春風競桃李形相脫略畦迳出木石與居真色起有如
老僧坐荒谷萬籟無聲心若死蒼茫東絹靜有餘後來學
者何紛拏略如取土得皮相遺其精者存其麤先生神妙
本天性狷介已號當時迂強舒俗手求貌似直以燕石矜
璠璣此幅神完氣逾古經營已見良工苦燭爇香殘酒醖
空老郎自向廚頭取忽云尾白待題識今雨不來來舊雨
瓶花老屋冰雪深數盆敗菊橫焦琴絕無爐火相暖熱但
覺夜氣寒森森畫圖亦洗脂粉馨與人與屋皆相近況是
元冬百物枯庭前樹石還相證我亦有心如槁木未敢重
偷升斗祿慙留詩債入新正償君自挂瓶花屋

明霞墓

小碣明霞葬北山魂歸猶自淚潺湲澄湖月落開妝鏡修
竹風鏗隱佩環慧業難消天意妒風情須待老來刪春林
自灑顰鵲血腸斷游人日往還

覺羅恆慶字梅村滿洲旗人歷官湖北糧道有懷荆堂
詩藁

自上津赴邊界防堵宿槐樹溝口題壁

默祝烽煙靖書生學掌兵深山秋試馬細雨晚屯營令易
千軍肅詩難五字精溪流喧子夜不寐聽雞聲

張裕穀字怡庭儀封人蔭生歷官雲南迪東道

秋夜山行

秋月何皎皎秋山自悄悄黃葉彫青溪涼風飛白鳥山中
行役人塵襟滌清曉忽聞煙寺鐘鏗然出林表

秋日感懷

刺桐花老紫萸香又聽賓鴻唳早霜沙草寒依秋火白瘴
雲低壓夕陽黃城頭鐘鼓初逢夜村落人家未滌場好煞
蠻歌清月下不須鐙火照河梁

山城

桂燭光殘冷畫屏連宵風雨送流螢秋聲只在芭蕉上夜
半山窗倚枕聽

陳廣甯字默齋浙江山陰人廕襲騎都尉官至雲南騰
越鎮總兵有壽雪山房詩藁

詩話默齋少習舉子業工詩文以難齋襲職改武階
爲阮文達百女敏所器賞當時名輩如覃谿小峴穀
人船山諸公往來酬唱皆相推重集中
越中忠節諸詩激昂慷慨尤見遠識

蘭亭

蘭渚山深渺煙樹舊是越王種蘭處孤亭聳峙寒雲中內
史幽蹤曾暫住憶昔永和修禊年交游一一皆詞仙孫李
許支並傑出青山亦樂多名賢修竹茂林殊自好回頭往
事傷懷抱觴詠於今無一人春風空發亭邊草吁嗟乎昔
賢已去不可留亭虛水曲徒悠悠勝舉欲嗣二千載眼前
爭得逢名流令人憑弔空增愁

深秋與徐漁莊登玉屏晚眺

兩人合著畫屏裏身似寒松心似水穿松涉水吟未已落
日平蕪澹千里蕭蕭楓葉飄丹黃林下人家打稻忙遙指
炊煙風裊處矮腳雞肥白酒香猗嗟山村人兮樂莫樂何
不與子買廬落

吳山眺望

石磴高攀到岫巔空濛遙望夕陽天江邊樹色都含霧湖
上嵐光欲化煙越國雲山原不隔宋家宮闕更誰憐思鄉
弔古空回首獨立蒼茫萬感牽

曹山

鏤刻疑鬼神玲瓏成戶牖深黑不見光搖艇入巖竇淨綠
靈境開碎碧晴光漏苔蘚何淒寒日夜錯昏晝稍覺蘿蔓
深漸見松竹茂深淵聳石崖淺瀨注奔澗轉迂剗削工得
覩芙蓉秀

山循石竇入曲折難摹寫暗牖穿穴深飛瀑綴簾下面面
開畫圖勝境塵世寡西曜射流光峭壁忽丹赭嶺松澗橫
截山梁雲倒瀉差似入仙源頗宜居隱者何年此讀書慨
息發中野

蓬萊山觀海

忽訝乾坤一氣浮，雙丸終古浸洪流。
此身直欲窮三島，是外猶傳有九州。
盤折好循仙掌露，微茫難認大洋舟。
諸山羅立如兒輩，我獨攜筇最上頭。

朱曾敬字尊一，厯城人。厯官柳州知府，有柳社集。秦游草。

秋日村居雜詩

幽棲屏跡小村中，風景依稀柳市同。
蔬圃秋聲瓜架雨，草橋野色藕池風。
喧闐腰鼓迎田祖，醕酹肩衣散社翁。
最愛山前霜信早，千林柿葉一分紅。

秋陰

淒迷暝色淡斜曛，颯颯西風送雁羣。
礎潤連朝知釀雨，松

寒終日自棲雲天圍遠岫渾難辨水接平煙竟不分書篋
無端生白蠹臨窗點檢蕪香芸

汪爲霖字春田如皋人歷官鎮安知府有小山泉閣詩
存

庚戌仲春因公乘傳道出巴陵暮登岳陽樓感賦
日落巴陵道登樓意浩然神仙不可見遺蹟至今傳暮景
來蒼莽年華感逝川凭欄一杯酒餘醉枕湖眠

千佛嶺同竹公卓公兩和尚看月

昨宵風雨投靈谷萬斛松濤一鐙宿騎驢侵曉到棲霞竹
光染得秋衫綠贊公與我同鄉親邀留飽啖齋廚蕪溼雲
掃盡山骨出高座同參清淨因移時隔崦鐘始發仰視晴
空挂明月尋幽更上翠微巔曉色齋心清到骨二十年來

路萬千擔簦戴笠笑徒然不如黑漆蒲團坐收拾名山到眼前

雨中抵京口

天際帆檣萬馬來岷江東下妙高臺海門蜃氣爭潮立瓜步鐘聲挾雨迴四面煙雲雙醉眼千秋壇坵幾詩才今朝爲訪南山寺欲倩名花頃刻開

寒夜舟中寄稚存

纔見君行我又行帆隨寒月落蕪城人間出處真難料別後蟾蜍已一更險韻深杯猶昨日大名巨手定生平不知裙屐清歡夜憶否桃花送客情

著述歸來又等身蓬瀛沙磧等前塵常將治亂悲千古不負科名有幾人放眼看山詩是債經年作客酒爲鄰遙思

此際焦公洞搜剔遺碑岸角巾

舟中曉起偶成

世界同泡漚本諸釋氏說人生泛虛舟老莊旨頗徹眼前
卽是道底用譬空設昨夜卧舟中酣夢無殊別夢中行百
里那識路拗折遽然覺推枕便是小生滅昨從何處來境
界已懸絕風水不暫停帆影去如瞥

江昉字旭東號硯農歙縣人候選知府有晴綺軒詩集
常王孫種菜歌

卷綠含芳心春風吹不碎故侯五色瓜王孫一畦菜王孫
本自開平家運逢百六良可嗟萬事消沈付雲水百年帶
礪成空華帝城金粉歸何許山鬼年年哭風雨金鑿玉膾
相公家紫蘚蒼苔孝陵土故壘蕭蕭蘆荻秋石頭城上月

如鉤路人猶指王孫菜江水茫茫去不休

桐江雜詩

重岡複嶺鎖煙霞林靜風微鳥不譁誰道仙源無路入落
紅流出澗中花

棲靈寺

好風助帆席乘流溯滄浪暢此澹蕩懷焉問去路長白鳥
點空碧導入雲水鄉遙睇林木古巖壑含青蒼

舍舟尋石徑筇竹助幽興夕照餘寒暉依微上蘿磴猿鶴
無俗情山水悅真性寺門俯澄潭煙際一聲磬

田玉字香泉易州人官杭州都司有附蓬小草

金山夜月

浩淼秋空夜金焦相向明亂檣楊子渡遠火潤州城風定

鈴無語江流月有聲應知香海內大塊總浮生

虎邱

喧喧歌吹趁時游雲斂天香正及秋詞客舫依沿岸樹美人簾卷傍山樓但看七里花成市肯信三生石點頭自是江南佳麗地吳儂知樂不知愁

黃易字小松號秋盦錢塘人官山東運河同知有小蓬

萊閣詩

詩話小松爲黃松石樹穀之子松石工隸書喜金石故小松亦嗜古如命搜羅漢碑甚多其罕見者雙鉤行世畫尤有名小蓬萊閣詩未見傳本近人輯秋會遺藁二卷其中七絕居十之八九且多題畫題圖之作雖非高詣然雅人自無俗語也

題劉觀察純齋懺心圖

身經萬里頭初白名已千秋心自清慧業懺除禪味好貧

簷深處聽泉聲

鄭魯門得停雲館遺硯

邊闌題認黃初字小印鐫疑國博文合與先生書篆隸雨
昏時候起寒雲

忠孝家傳兩相名一門翰墨冠前明風流已往貞珉在此
亦人間玉帶生

送郭十四南歸

踏雪送君去江南筍正肥花隨春雨密帆逐亂雲飛歸興
濃於酒波光綠上衣官閒貧亦好來往總忘機

楊兄鶴洲購贈元氏贊皇石刻有漢篆三公碑甚奇
喜極復求沈君愚溪覓之

古人不可見古跡亦有數靈奇祕幽邈難致空懷慕楊兄

元氏來古物欣所聚啟篋見百幅如涉山陰路墨翠開春

巖字明點煙鷺壇山強弩張

周穆王吉日癸巳篆

白石神虎步

漢白石神

碑封龍殘字四亦得褚歐趙

唐李公緒碑

最奇三公碑琳琅漢

玉筋蟲蝕二百字瘦蛟蟠老樹疏密任意爲篆隸體兼具

或屈玉折刀或懸鉞垂露或疾若風行或鬱若雲布辨文

知馮君禱降甘雨屢絕類五鳳碑證字亦有魯

有魯字類五鳳碑字

歐趙錄不同或未身親遇我見誠奇緣狂喜不能語平生

嗜古癖於此得飽飮漢代六名山元氏碑尤著便欲策杖

探羈栖苦難赴官閣有休文神交託心素遙結歲寒盟可

同金石固馳求三百番療我煙霞痼

游洛陽道中

嵩少歸來指洛陽崎嶇歷後盡康莊人誇走馬看花地我

愛尋僧選佛場苔蘚殘碑迷漢魏戰爭舊壘認隋唐前賢
只羨西崖好配食香山葺小堂

陳及祖字寄吾號春圃祁陽人官直隸昌平知州有二

蕭吟藁

詩話春圃爲文肅公第五子典州左輔中歲乞歸詩藁未刻行今存二百餘篇詠梅諸絕句頗有山林閒逸之致

憶祁山

祁山高峩峩羣蠻如聚族萬疊杳靄閒高低騁游目九疑
相與青碧雲迷其麓秀色撐晴空翠黛皴滿幅想見丹崖
翁此中卜幽築何時挂冠去與子同空谷

張道渥字水屋浮山人諸生官霸州知州有水屋贖藁
在屯值寒食節

時節牽歸夢猿嘯夢又闌宦情原不熱旅食本長寒何異
投荒客真成耐冷官我非無麥飯欲灑墓田難

管學洛字道明號午思武進人候選知州有祇可軒刪
餘藁

黃鶴樓

倚城百尺上危樓雲白山青漢水浮豈有神仙能不死是
誰詩句合長留煙波東是還家路風浪中多待渡舟同一
登臨懷抱各何妨崔灝在前頭

與陳澍齋

廣衡

論詩

我讀古人書如接古人膝殘篇斷簡中生氣各勃勃奮興
百世下代代有豪傑聚集古之人一手一枝筆或大將旗
鼓或短兵相接或公子褐裘或美人密室或點睛而飛或

九仞猶搗或長江千里或春池自碧離合與悲歡風花兼
雪月一一羅胸中奔赴腕下出譬調腕中羹醢醬非一物
鯖聚五侯饌蜂採百花蜜譬製身上衣豐纖人各別刀尺
有定程裁縫間疏密才人須積學不可恃天質賈胡識奇
寶有愛不能割眇者矜妙悟顛倒捫籥日皆緣讀書少不
自知其失探驪須得珠擒虎須入穴區區獺祭功終非制
勝術古人有彩毫我欲從之乞乞來持贈君與君結膠漆
連日讌集近園卽席呈洪穉存亮吉太史

東風易主始經過挈伴替裙狎薜蘿便恐煙霞遂成癖花
時載酒醉時歌

樽前爭量句爭妍舊徑低徊憶往年但使園林容客醉便
非我有亦欣然

徐書受字尙之武進人官南台知縣有教經堂詩

詩話尙之詩悱惻纏綿意出心發畢秋帆選刻吳會英才集凡十二家尙之其一也

送秋塋暫往保定卽返秀水

王郎王郎大磊落才名二十載不免尙飄泊平生性命爲
友朋緩急至今誰可託眾中遇我更不疑一見高呼動魂
魄王郎聽我語足以慰爾飢擇交定交始乃克全交期苟
未保厥終不如不相知當時顏苦瘦今已面有髭髭鬚鬚
髮短短嵇非懶兮阮非誕君曰悲乎豈在飽煖不封不樹
蓋不敢緩以此感激卑官不辭孝子之志誰當諒之嗟君
勿戚貧而病我亦年來知定命母殯松楸繫夢思嚴君萬
里違溫清君由保州去南抵長水塘行將告我友我友錢
之與楊西禾高堂白髮各相守何事遨遊離故鄉

感興

沙沈石銳倏低昂歸路甯如去路長
天遠樓臺時出沒秋暄林木半青黃
感知人少空懷刺惜別情深況陟岡
遙憶大雷書到後曉風寒月正茫茫

新嶺

振衣忽霄漢巉絕已平視一綫上天
輿萬笏出地底斜日在半崖高鳥飛
不起豁然倚層空盤旋徑邇迤雲生乍
籠袖澗響復盈耳何處煙林鐘天風吹
十里躡景有羽翰蒼蒼暮凝紫

廣濟橋訪謝茂秦故居不得

斯人高卧久榛墟誰復能來式故廬
史論抑揚存節槩聲華標榜自乘除
才非勁敵輸蘇李事已凶終悔耳餘
爾日

升沈何足恨不應重廣絕交書

徐文長謂以軒冕壓布衣王漁洋則云王李詩實勝

予持平其論如此

南天門

冒嵐餘淺雪疊石構飛臺馬自嘶風立人因出隘爭巖凹

捫虎跡天外走雷聲登陟真稱快徒令怯者驚

敬熙詩云寄語後來

人登臨莫稱快予故言然

失勢愁千丈回眸忽百尋後崖迷向背半壑劃晴陰徑滑

披榛翳霜嚴少樹林欹裘珍愈暝秋塞已寒深

王復字敦初號秋塍秀水人官偃師知縣有樹蔭堂詩

詩話穀原之有秋塍猶礬石之有百泉宣臣之有明甫各以詩承其家三人集中唱和甚多秋塍以清麗綿邈擅勝至其鉤心鬪角辭必已出則三人者家法相同也

次韻答紅泉題予游草之作

他鄉負米記年時惜別懷人得句遲繫馬垂楊村店酒落
帆斜日女郎祠心酸南浦江淹賦腸斷東風賀鑄詞不是
天涯倦游客此中愁思更誰知

送褚靄巖之淮陰

斷魂細雨散如絲別袂依依柳下持草色青迷沽酒處杏
花紅點渡江時相逢定下南州榻謂李君懷古閒尋漂母祠
我亦天涯潦倒客河干待挂一帆遲

上元前二日鄭紅泉錢百泉約齋汪雲壑陳東川過
集齋中

淡宕試鐙風歷亂催花鼓盼春春已來淑氣益亭午南榮
坐故人清襟散蘅杜瓶卉香細浮幽禽屢窺戶對此景物
和歡言酌芳醕苟非愧粗供廚乏絡秀女笑語粲燭花暝

意尊前照惟茲文字交便擬醉鄉侶中覆暗自欣戰拇紛
難數百斛亦何辭獨醒真徒苦嬋娟月滿簾掩映色殊嫵
幽巷聯臂歌往來同織組試教影吟三未許更催五狂思
買良宵那辨金如土

冬夜金閨道中舟行聽雨同徐秋湄作九疊鼓字韻
作寒雨意濃飽帆風力鼓鐙影接山塘市聲收夜午襖被
溼氣侵篷罅漏痕杜撒捎忙點篙淋漉憐船戶鄰舫語喁
喁紅燭共傾醕蕭蕭暮雨歌愁殺盪舟女淒清冷未眠爐
灰撥難照煙波連震澤共濟欣有侶花店七里情高樓兩
岸數阿誰同夢甘奈此別情苦徐陵綺語工風流玉臺嫵
湖雲黯回首愁緒縈如組浙浙增悶懷初程纔百五何處
館娃宮脂粉變田土

玉存賦長句贈行次韻留別兼呈楊西禾

同雲四野雪意生津頭衰柳寒煙橫故人戀戀未忍別黯
然攜手難爲情長安遠望三千里回首鄉關隔江水日昨
褰裳共溯洄渺渺相思亂荒葦寓齋近接巷西東壚頭取
醉招揚雄寒窗促坐語淒楚地爐榾柮深宵紅感君賁氣
勤相訪乞米同憐困塵鞅燕趙冰霜我北征穀函風雨君
西上玉存將之山右隆冬澤腹堅不波客裏誰歌毋渡河穎士才
名空負僕杜陵離思獨騎驟蕪城隔歲追前景踏凍相攜
萬松頂猶記高樓大道旁煙雲變幻隨蛟蜃去冬客揚寓居學舍小樓
玉存時過晤談何日雙眉得暫開悲歌且上燕昭臺男兒三十不
得志一身飄泊同飛埃臨歧百感紛今昨香土還期來歲
約酒人擊筑和荆卿樂莫重逢故交樂玉存訂來秋入都

送邵二雲編修入都

論交半載飲芳醇
祖帳新圖越水濱
海內才名唐制誥
膠西經術董天人
扁舟安穩圖書重
長路寒暄眷屬親
到及六街春色早
編摩藜火夜重陳

牆下小軒題壁

小築三間屋幽居
春事宜林深知鳥
樂牆短愛梅敲地
占金陀里禪參玉
版師經營真不易
誰寄草堂貲

寒食日雨中吳竹嶼先生招同錢獻之洪稚存孫淵
如集杏花春雨山房看花用昌黎寒食日出游韻
百卉待澤如渴病花信番番吹轉盛朝來潑火恰如期
黯黯檐端溼雲映野外閒情拾翠偕城南嘉約搖鞭競絳幃
高捲賞穠華藥鼎微溫伴清詠含風翠篠弱欲扶帶雨紅

妝敵不正及時良會安可多過隙韶光豈能更先生早自
遂初服廿載名山天所命白公舊賦紫薇詩杜老新歌白
木柄雲霄故人遠見招河汾弟子交相慶冷節纔逢插柳
新殊鄉仍展維桑敬座中錢孫話昔游芳草天涯阻遙覓
二分月影到蕪城千頃波光泛明聖丁酉同淵如客揚
己亥同獻之客杭頻
年遠道各羈孤幾月官齋歡合併爭看好古發幽情亦或
耽吟同僻性向晚廉纖響漸稠籠陰綽約枝交橫屋角頻
聽鳩婦呼籬根暗想龍孫迸良宵拌共倒深卮陋質真慙
對清鏡沈沈漏箭早催歸旣醉還期緩觴政六街鐙火照
初更料峭穿衣寒尙勁佇教來日快新晴還擬尋芳趁佳
令

楊瑛昶字米人桐城人署寶坻知縣有燕南趙北詩鈔

重過趙北口

趙北燕南淡夕暉重來依舊傍漁磯
舉頭見日雄心在翻手爲雲世態非
拙宦真成槐國夢勞生難息漢陰機
消魂舊種隄邊柳和雨和煙已十圍

盤山絕頂用戚少保原韻

松濤捲地朔風哀絕塞關河一望開
落日遠沈遼海去春光遙度薊門來
短衣匹馬殘年志白髮丹心老將才
故李將軍今在否萬山高處有荒臺

湯懋統字建三號青坪巢縣人諸生由訓導厯官遷江知縣有青坪詩集

冬月河亭卽事

危欄偶向醉時憑風碾寒流碎玉繩
亭下何人夜吹笛一

蓬殘雪蓋漁燈

孫文驊字雲衢號曉山綿州人諸生官黃安知縣

游千工堰因登五雲山和盧鏡亭茂才

廣韻

瘦馬穿雲入閒情偶樂山人行千樹底村在萬峯間亂石
成三徑流泉匯幾灣蘭亭餘斷碣我爲拭苔斑

蕭抑之招飲張家寺

繞村楓葉錦成堆夾路寒花石罅開古澗曲從山腳轉凍
雲低壓馬頭來尋幽舊有宣城癖授簡新增雪苑才昨未
得游待今補重披古碣掃莓苔

黃立世字卓峯卽墨人舉人官花縣知縣有四中閣詩
鈔

高郵懷秦少游

不見秦淮海扁舟此日留地當名士後水竹亦風流沙鳥
閒相語江花迴自愁幽懷何處寫玉笛起高樓

嶧山湖

娟娟銀漢墜煙樹鏡中分秋水能生月湖天不受雲峭帆
何處落哀雁一時間客緒容拋卻青尊夜半醺

立秋前一日作

目笑年年類轉蓬閒將棋局與詩筒羲皇以上推元亮山
水之間寄醉翁竹外連宵足寒雨天涯明日又秋風卜山
忽送憑高目雪爪從新問塞鴻

過六盤山

吾愛山之奇尤愛山之險每當偈仄處鳥飛亦無膽一盤
復一盤如帆隨湘轉盤盤入太空腳底白雲坂天時豈有

異山深各寒暝昨日榴花開今日雪花滿

顧璽字戒菴江甯人官江西知縣有遠音集

桃源洞

路問桃花源遙指白馬渡
曉藹雲氣深秦人從此去
秦人去千載白雲長自護
何年靈境開花源忽呈露
從此傳人間物外感生聚
我來已深冬不見桃花雨
林深水無源水繞山迴互
草木淨餘芳魚鳥適幽趣
彷彿雞犬聲遠出雲中樹
奇踪託杳渺欲覓曾無路
嗟彼武陵漁津逮仍迷誤
爲問避世人高舉將焉赴
淵明結妙想孤懷聊自寓
寓言非人間愴怳何所慕

飛雲巖

西南山多奇飛雲更奇絕
高竊勢欲奔拔地恣幻譎
初疑

卷怒濤陡若翻積雪盤旋入青冥委宛赴寥泝山與雲氣
浮雲出山之穴一氣相吐吞誰能事分別幢幢華蓋懸閃
閃風輪挈坤靈發祕奧雕鏤元氣泄俄聞響春雷駭若飛
列缺不知何處泉翻空飛玉屑高蹤緬前賢披榛尋斷碣
按籍不可求別獲聖果偈陳子重演黔紀游所載之碑已
不可得別獲聖果偈石刻于重
所未及者儒墨豈同科達者自綜擷讀如箝在口蟲魚多漫滅
鈍根落塵緣解費生公說字畫不辨惟
老僧能讀坐久陰風生凜冽
豎毛髮蕭蕭眾壑鳴萬象紛軒頡陡抱杞人憂難爲靈境
悅樵青不解事瞪目復撝舌何年噓氣成終古此盤結

伏波廟

逆莽乘權竊神器龍蛇戰野天日蔽雄也作頌歎也臣讀
書萬卷綱常味是時伏波伏草莽懷才欲試空無計子陽

魄囂俱僭竊紛紛割據皆稱帝公時遨遊蜀隴間足履其
庭心竊議世亂時危漢鼎移迴翔審顧難爲地白水真人
起南陽蒼生有託神明契英雄一見決先幾從此委身心
不二始知帝王自有真區區邊幅徒滋僞聚米陳籌指掌
中中興戡亂歸睨睨風雲遭際亦偶然獨具巨眼乘時會
赤符應識大創平炎炎火德中天繼徵側披猖又寇邊一
麾再掃交州沴至今銅柱標南服當日明珠讒苴惹只此
已足表旂常胡爲雄心猶奮勵七十霜髯再據鞍五溪南
觸蠻荒厲馬革豈真求夙願久要竟墮斯言淚清浪灘頭
金碧輝靈旗風卷彤雲翳鷓鴣不呼神鷗翔洪濤泅泅餘
戰氣舟師佔舶盡解帆巴童作舞楚巫祭試問雲臺何處
問遺踪公之英靈猶利濟

應澧字仔傳號叔雅又號藕泉仁和人貢生官安吉教諭有閨然室詩存

聞洪稚存自西域釋還

一官狂慙近沽名匹馬安西萬里行隔歲雷霆天霽怒逐臣席帽夜論兵方流玉水誇親歷積石河源憶改更歸及酒泉應失笑渴羌依舊醉顏頰

王初桐字于陽號廣仲嘉定人官山東齊河縣丞有海右集

觀磨崖碑作

七十二君輦道荒云亭蹤跡俱微茫祖龍之碑既無字金函玉檢疑荒唐開元天子履全盛意氣直欲無軒皇東封自古稱大典遂令下詔開明堂勒銘大抵示符瑞揮灑御

墨輝天章高文或出燕許手長篇大幅何煌煌當時海宇
本殷富發揚蹈厲窮鋪張八分淋漓六百字穹崖屹立三
丈强芝英鶴頭體製別筆勢髣髴酸棗兼中郎焦山鶴銘
鼎銘何足數庶與朱陵洞天岫嶠銘相方惜哉天寶末諸
楊亂其綱風塵湏洞一朝起鼙鼓動地來漁陽珠沈玉碎
銅狄燬惟有此碑終古垂琳琅毋乃鬼神自有木甲護不
然安得風饗雨虐依舊光芒長流傳完本世間少頗思拓
之以碩黃他時攜歸向吳會什襲珍作蕭齋藏奈何梯青
躡翠必鉅費而我羞澀垂空囊聳肩仰面百徧讀口角流
沫神揚揚信知岱宗大觀此第一秦松漢柏皆枯僵

旅舍感懷

蕭蕭蠹葉下高藤客舍驚心感慨增萬里星河秋早雁一

簾風雨夜深銚買田計就思陽羨賣賦金完憶茂陵幾日
陰晴渾未定青山滿眼曲闌憑

土橋

鹿角關頭小市塵土橋雪後見平田鴉盤枯樹荒村外雲
漏斜陽斷塔前故國江山空極目天涯風景又殘年可憐
一宿萍蹤地回首安陵亦黯然

甯海雙松歌

昔游慈仁寺下馬尋雙松金元舊物竟何有毘盧閣圯荒
煙空五年薄宦來東海別有雙松此間在不知是宋是金
元約計亦踰三百載古貌蚪髯劇怪奇屈蟠偃蹇老龍姿
若教拔地擎雲去定見杈枒鱗鬣撐之而只今排立依蘭
若黛色參天翠交錯謾謾風濤半夜生泠泠琴韻諸天落

爲棟爲梁匠石來千秋萬歲明堂開天生大才必大用才
人未必皆塵埃平生小隱隱林藪自顧原非斲輪手歸去
清齋摘露葵著書長伴支離叟

高適故里

高三十五悠悠者半世漁樵孟諸野健筆題詩寄草堂才
名不在岑參下故里依然草澤濱數家老屋自爲鄰可憐
我是風塵吏兼作東西南北人

朱光暄字晴嵐號蓉湖海鹽人貢生官於潛訓導有健
初詩鈔

舟至鴛鴦橋

鴛鴦橋畔樹臨溪樹頭一對鷓鴣鳴鷓鴣鳴處人煙少惟
有漁翁傍岸棲

秦溪春泛

一舟汎汎落晴煙望斷秦峯百尺巔
牧笛數聲寒食路酒旗十里杏花天
帆隨春水風中飽雲在青山缺處眠
好是尋芳三月裏泊隄新漲正涓涓

穆得元字東軒固安人官延慶訓導有漸于集

官舍夜吟

廣文官獨冷僻地恰相宜
塞近迎寒早山深得月遲
課書頻翦燭看劒幾傾卮
吾自尋吾樂良宵一詠詩

伍光瑜字孚尹號屏秋上元人貢生候選訓導有補園

詩集

題姜笠人

漁

杜鵑花畫扇

離離瓣染紅綃色細細叢抽紫玉絲
忽觸子規聲裏事曲

開庭院暮春時

李承烈字芭泚又號見石老農鄞縣人諸生官松江府

經歷有修齊堂詩鈔

詩話芭泚詩英氣騰踔蘊藉風流長短諸篇皆能準理命意精神貫注嘗在吉有齋制軍幕從百色平苗遂以禾中司鐸擢松江參軍舒鐵雲贈以詩云官從蘿萊香中轉人自梅花瘴裏來

一翁行爲閭家店老人作

四圍寂寂雲蒼蒼茅屋閉門樹壓牆一翁扶杖立道旁面
黑髮蓬形瘠脰有客有客自遠方白馬紅纓束錦纒忍飢
百里來此莊左顧右盼心皇皇見翁下馬索糗糧翁爲流
涕褰衣裳引客左旋登草堂坐客東壁之繩牀爲言厯歲
歲大荒顆粒不入倉與箱巧婦欲炊無秬稷草根樹皮充
飢腸年來草盡樹亦戕老幼餓死壯者亡十得一生終不

祥三春大疫成膏肓村中男女百口強熬遺一老凌秋霜
雞犬不聞牛馬僵敗蘆裹屍道相望至今白骨無人藏焉
得一飯王孫嘗客聞斯言心感傷別翁淚溼雙目睚出門
上馬手執纜欲行且止重徬徨餓眼看天落日黃

落葉

飄零畢竟較花遲。纔見蕭蕭謝故枝。隔院影飛殘照外。空庭聲墜晚風時。爲誰彈淚偷題曲。有女含情欲賦詩。卻喜林間燒不盡。夜窗分與學臨池。

白帝原非雨露慳榮枯物理亦循環堆來有跡山山暮聽
到無聲樹樹閒薄命自甘沈碧澗傷心不是爲紅顏樊川
莫憶成陰日一任東風去復還

李燧字東生號青壑河間人官浙江下砂頭場鹽課大

使有青壑詩彙

九日同李晴軒叢臺登高

磴道倚荒城叢臺舊有名河山銷霸氣木葉亂秋聲雲淨
千峯瘦天空一雁橫盍簪逢令節好結歲寒盟

寶應道中

卅載江鄉繫夢思風光回首舊游時溪灣老樹曬魚網屋
角夕陽明酒旗陳蹟已迷鴻印爪清流空照鬢如絲行行
漸覺維揚近一帶隋隄柳萬枝

平望遇雨

匹練橫空日氣消菰蒲葉戰風蕭蕭一聲雷送太湖雨七
十二峯雲擁潮

曾艾字同俊一字虎卿號雲溪新化人官永豐州同殉

難

詩話虎卿書數董華亭屈於下僚乾隆季從軍福文襄頗賞之分防冊亨狎苗來攻城破全家並殉後改永豐爲貞豐而州同駐冊亨如故

黔中送友

客裏難爲別春風送遠行飛花明驛路落日照邊城
骸骸虞翻骨噲呖夏統聲黔西天萬里揮手淚縱橫

朱克振字肇修南宮人官曲江縣丞有方有齋集

燕臺懷古

高城落日晚煙平郭隗臺空蔓草生老樹寒鴉同黯淡
斷碑荒冢弔清明驚沙久沒昭王壘古道猶傳耶律營
我亦頻沾燕市酒悲歌那復見荆卿

姜貽績字古漁大名人官上海主簿有睫巢詩鈔

眉月

盈手方驚錯如眉細逼真二分明未鼓一曲畫初新有態
堪描額無心不帶顰幾回樓上望愁殺卷簾人

梳妝樓

山名以象或以形不聞山以樓爲名樓或在山山得名斯
何爲以梳妝稱山頭眾峯呈象巧奩匣窗臺啟情曉方疑
布盞圓鏡磨釵股牙梳橫列好山前一峯尤爭妍長肩秀
削姑射仙得非神女行雲偶過此抑或望夫來登久不還
尋碑剝蘚空山空鑿斧豈有神鬼工因象爲名本形似循
名責實其安庸世間名實類如此耳食目論真兒童

王翼孫字以燕號聽夫長洲人官襄陽呂堰司巡檢殉
難予雲騎尉世職有波餘遺橐

自竿澗嶺鰲魚溝至古北口作

雄關古北從來險此日經臨轉覺平
竿澗盤旋乘月過魚溝曲折遡風行
隔山老樹連雲暗滿澗春冰帶水鳴
迴首從官皆下馬笑他輪與瘦書生

過丈煙臺

石磴連雲上煙嵐幾丈疑山深多好樹地僻有靈芝果熟

猿先摘花開蝶未知老僧無箇事勤護海棠枝

寺有海棠木瓜塞上

大條采以入貢貴僧守護甚嚴

王世錦字再陸吳縣人官嘉峪關巡檢有藝芸館詩鈔

華陰廟望嶽

高閣巍峩少睥宮仰瞻咫尺逼蒼穹
蓮開玉井雲收白掌拓天門日映紅
突兀三峯凌斗極渾淪一氣滿關中
攀援

自有鉤梯在骨之希夷漫御風

陳丙字吉甫天長人官貴州永甯募役司巡檢有復廬詩萃

秋夜

涼飈發中夜殘月照庭柯境僻清歡足宵寒濁酒多醉憐花影瘦愁聽雁聲過忽憶伊人別相思起浩歌

送別

惜別情何極離亭柳共攀月明林樹杪人語翠微間逝者渾如水歸興未買山臨歧語行子莫待雪霜還

晚晴謄詩匯卷一百三終